

1 TIMOTIY

Pol Minj Nind Ak Timotiy Nup Tikak Minim Nind Ninjep

Timotiy miñmon nuk ak Liystra, Galesiya propens nimb. Nonim nuk ak Jiwda nimb, nop ak Griyk nimb. Nuk bi paranj mindiy, Jiysis nup kisen nep chingek, Pol nup dand tangying, Jiysis minim tep ak angñiyngipiy. Pol minj day nind Timotiy nup tikak biy, minim yomb ar ominjal nokom angak.

Minim bap angak ak, “Biynimb Jiwda yipund giy gok sek, Jiwda mer gok sek kilrimey gipay ar ak, nimb yip ma ginimimb angiy” tikak. Minim ar bap angak ak, bi Gor biynimb kond mindep gok dining, bi Gor nup gosimb ninjy, biynimb direp giningiy gok nep ninjy dinimimb angak.

Pen minim kisen angak ak, Timotiy nup, yergiy Gor nup bi wong giñemb tep ak mindiy, Gor biynimb nuk gok kuyip, kond mindeningamb minim ak angak.

Minim Ar Keykey Mindip Rek:

Minim nind angak ak mindip, chapta 1:1-2.

Biynimb Gor apiyminay kuyip chingyak gok sek, bi kuyip kond mindep gok sek kuyip, minim angak ak mindip, chapta 1:3–3:16.

Timotiy nup wong minim ar ak, angrep gak minim ak mindip, chapta 4:1–6:21.

¹ Yand Pol. Gor apiyminay chinup pisnep diy dand amningayr angyi ninbun ominal ak nep, yip anger, Jiysis minim dand amemb ak mindpiyn.

² Timotiy. Yand nep angrep genik, Jiysis nup gosimb ninban ak; nip ñi yand apiyn. Bapiy Gor yip, Biyomb chin Jiysis Krays yip nip simb ninjiy, kond mindrep ginimiy.

Minim Yesek Anjningiy Ak Ma Dinimimb

³ Yand Yipiyises mindiy, Masedoniya propens amning, nip kun okok angay, biynimb Gor minim aspun angyi minim yesek apay gok kuyip angenimin, minim kun ak kirginingiy angnik rek, tip ak aspiyn. ⁴ Sosim ar gunap apay gok sek, nusind nupis yes yerer giy tikey wip angyi apay gok sek angey, kirginingiy. Minim kun gok angyi, penpen nep apay. Gor biynimb dinimun minim ar ak angey, yomb ginimun ak pen; minim kiyk apay kun gok ninjiy, Gor nup gosimb ninningiy ak ma mindip. ⁵ Pen biynimb gok sun-tep mindiy, Gor nup di mindmangiy yimb ay, mindrep gem-biyap yip tep gipkop. ⁶ Pen gunap kinjen tep ar kun ak kirgiy, minim yikop okok ang amiy apiy gipay. ⁷ Chin Gor low tiysa gok mindon apay ak pen, minim apay gok, minim junj aspun ak angyi, ninrep ma gipay.

⁸ Chin kun ak rek ma ginjun. Gor low minim nuk angak ak, tep yimb mindip ak pen; low minim nep angyi, minim nup gunap kirginingambun ak, tep ma giningamb. ⁹ Per low minim apun ak, biynimb mindrep gipay gok kuyip ma apun; biynimb monmon gipay gok kuyip apun. Biynimb mindrep ma giy, timey

gipay, chip ñapay, nonim nop kiyk key pikaypay, ¹⁰ biyn siy bi siy gipay, biynimb singil wan gipay, biynimb yesek angyi akan, yerer giying minim ninind yimb ak kirpay. ¹¹ Minim ninind yimb apiyn kun ak, Jiysis Krays minim tep ak. Gor Biyomb melik sek ak, biynimb direp giyn angyi yip angek, minim tep kun ak angñirapiyn.

Gor Pol Nup Simb Ninak

¹² Biyomb chin Jiysis Krays, yip ninjek wonḡ nup ak gep rek ayek; wonḡ kun ak angay kond mindakniḡ gipiyn ak, nup tep apiyn. ¹³ Nind mindrep ma yimb giyingipiyn. Gor biynimb nup gok kuyip timey giy, Gor nup angjiwiḡ giyingipiyn. Pen Gor nup ma ninjiy, minim angak kiñiḡ ak ma ninjiy genik mey, yip simb ninjiy dak. ¹⁴ Kun ak yand bi tep mer ak pen, biynimb nuk gok kuyip per gip rek, yip gos tep ñek, nup gosimb ninjiḡ, biynimb gok kuyip wasemb aypiyn. Kun ak nup tep yimb aspiyn.

¹⁵ Minim ninind yimb ninjiy, pisnep diniḡgambun bap angniḡ gispiyn. Krays Jiysis biynimb man ar biy, tap siy tap timey gipay gok kuyip, diniḡ owak. Bi tap siy tap timey yomb yimb giyingip ak mey, yand nep. ¹⁶ Pen yip diniḡ angak, “Bi tap siy tap timey yimb gip ak nup den mey, angniḡgambay, Jiysis chinup kunep diniḡgamb angyi, yip ker apey, kuyip den, perper mindeniḡgambay angak.” ¹⁷ Kun ak, Gor nuk Biyomb yimb; misen ma niḡbun; ma kumniḡgamb; nuk nokom Gor niḡind yimb ak, nup perper nep yimb dand aranjun. Tep.

Timotiy Nup Minim Bap Angak

18-19 Ñiyand Timotiy. Nip minim bap angning gispiyn. Bi Gor minim an gep gok, nip angyak rek nep ginimin. Minim yip ak diy, mindrep giy, Gor nup gosimb niyning, biynimb nup alemb alemb ñimbay gok kuyip, angñirep ginimin. Biynimb gunap mindrep ma giy, Gor kuyip gos ñimb ak kirgiy, apyap pikpay. ²⁰ Haymeniyas yip, Aleksanda yip kun ak rek gerik angnik, “Kun gipiy ak, chin yip jimñiy lotiw ma giningayr. Nirip kirgon, Seytan kind ak mindiy, miker yimb gek, Gor nup angjiwpiyr ak, kirginimiyr rek ayip angnik.”

2

Lotiw Gep Miñ Ar Ak

¹ Kun ak nen, Gor nup angningyning, tep angying gi mindenjun. Nup angningon; gapman biyomb gok, biynimb yikop gok mangiysek, kond mindonimuj. ² Kond mindakniñ, chin kapkap mindrep giy, Gor nup gosimb niyning mindonjun. ³ Gor Biyomb chinup simb niyiy dip ak; ⁴ biynimb okok keykey mindpay rek den, gos tep ak niyñan angiy niñimb.

⁵ Yenen: Gor nokom bap mindip. Pen bi nambnimb ak, kunep nokom bap mindip. Gor piskind ak mindip, chin biynimb gok piskind ak mindpun; bi nambnimb chin mey, Ñinuk Jiysis Krays. Nuk biynimb mangiysek di Nop yip jimñiy ayin angiy kumak. ⁶ Nind minim kun ak, ma niyningipay ak pen; biynimb niyñan angiy, Ñinuk nup yokek apiy, chinup nen kumek mey, misen niñbun. ⁷ Niñind yimb apiyn. Ar kun ak, Gor

nep yip angek, bi Jiysis minim dand amemb ak mindiy, biynimb miñmon keykey okok kuyip angñirapiyn.

⁸ Minim bap pen, bi gok miñmon okok mangiysek Gor nup chingrep giy, miluk ma niñiy, penpen ma angiy, Gor nup angniñying mindeningiy.

⁹ Pen minim bap, biyn gok kapkap mindrep giningiy. Mindrep gining, junkas malikiy, chech tep, biys, tap gol diy giyak gok ma ayingiy; ¹⁰ Gor nup gosimb niñbun angiy, kapkap mindiy, biynimb gok kuyip direp giningiy.

¹¹ Gor minim angningiy won ak, biyn gok kapkap mindiy, niñningiy. ¹² Yand biyn gok kuyip angen, tikjakiy bi gok kuyip kond mindiy, minim ma angñimbay. Kiyk kapkap mindiy, minim apay ak niñbay. Gipiyn kun ak, kiñiñ ak angning gispiyn. ¹³ Gor Andam nup nind gay, kisen biynuk Yiyp nup gayak. ¹⁴ Pen Seytan minim tom gak ak, Andam ma dak; biynuk nep minim yesek angak kun ak diy, tap siy tap timey gek, Andam kisen gak. ¹⁵ Pen biyn gok ñapan tikying, Gor nup gosimb niñying, suñ-tep mindey amek, kuyip diningamb.

3

Bi Gor Biynimb Nuk Kond Mindep Gok

¹ Biynimb Gor nup wong giy, biynimb nup gok kuyip kond mindonjun angiy niñbay gok, gos tep yimb niñbay. ² Pen nimb bi Gor biynimb nuk gok kuyip, kond mindeningiy gunap dun angiy, bi yikop gok ma dinimimb; bi minim sayn

gos ninrep giy, minim angñirep giningiy rek gok ninjiy dinimimb. Bi minim sayn tep, tap timey ma giy, ñing kilis kunay ma ñimbiy, biynimb okok wasemb ay, biyn kiyk nokom diy, biynimb gunap ninhey tep gek, kuyip angjiwningiy rek ma aynimun, bi gok ninjiy dinimimb.

³ Pen bi kalrimey jiwpay gok, penpen apay gok, ñing kilis ñimbiy sakiy aypay gok, gur-maniy nep gos ninbay gok ma dinimimb. Bi tep mindrep giningiy rek aynimun gok ninjiy dinimimb. ⁴ Bi ñapan kiyk amyong gok kuyip, kond mindrep gey, ñapan kiyk gok pen bapiy ninind angip angiy, nindiningiy bi gok ninjiy dinimimb. ⁵ Pen bi biyn ñapan kiyk key gok, kond mindrep ma giningambay ak; Gor biynimb nuk gok kuyip, yergiy kond mindrep giningambay?

⁶ Bi Gor nup kisen nep chingipay gok ma dinimimb. Bi kisen nep chingipay kun gok, biyomb mindpun angiy, Gor nup kirgiy, apyap pikningiy rek ayip. Seytan nind biyomb mindpiyn angiy, Gor nup kirgek, angyokak rek ak, kuyip giningamb. ⁷ Bi dinimimb kun gok, biynimb Gor ker ma mindpay gok ninjiy, bi tep angiy ninbay gok kuyip dinimimb. Yikop ak, Seytan gek, biynimb Gor nup ma dipay gok kuyip angjiwey, apyap pikningiy rek ayip.

Bi Diykon Gok

⁸ Nimb bi diykon don, biynimb kond mindeyan angiy, bi yikop gok diy, wong kun ak ma angaynimimb. Biynimb ninhey mindrep giy, ñing kilis kunay ma ñimbiy, minim yesek ma angiy, maniy tap gok yand nep diyn angiy gos ak ma

ninjiy, ⁹ Gor minim ninjind yimb ak, direp gipay gok nep ninjiy dinimimb. ¹⁰ Kun ak wonḡ sikoy gunap aṅgayem, yergiy rek giniṅgambay ak ninjiy, aṅgem diykon wonḡ ak giniṅgiy.

¹¹ Pen biyn kiyk gok kunep, ñiṅ kilis kunay ma ñimbiiy, biynimb gunap kuyip ma aṅjiwiyy, minim yesek ma aṅgiy; minim ninjind yimb aṅgiy, mindrep giniṅgiy. ¹² Pen bi diykon gok biyn nokom diy, biyn amyong kiyk gok kuyip, aṅgey mindrep giniṅgiy. ¹³ Bi diykon wonḡ tep giniṅgambay gok, biynimb namb ak yimb tep ak diy, Jiysis Krays nup direp giyiṅ mindeniṅgambay.

Biyomb Chin Gosimb Niṅbun Ak Key Yimb Gip

¹⁴ Kasek niniṅgayn rek ayip aṅgiy, nip minj tiksipiyn. ¹⁵ Pen kasek ma niniṅgayn ak, minj biy ninjiy, chin Gor biynimb nuk yimb gok, biynimb nuk gunap yip yergiy rek mindenjun aṅgiy, ninrep giniṅgamban. Chin Gor biynimb nuk gok, jimñiy korip sap kilis yimb rek mindon mey, minim ninjind yimb nuk ak, kurginimuy rek ma ayip.

¹⁶ Minim tep chin niṅbun ak key yimb. Jiysis Krays Nop yip mindiy, bi yimb ay misen owak. Kun giy apek enjol gok niṅyak. Gor Kawnan nuk ak, biynimb gok kuyip aṅgak, “Gor Ñinuk wip aṅgak.” Minim tep nup ak, miñmon okok aṅñey amnakniṅ, nup gosimb niṅyak. Nop nup dand andkind miñmon tep nuk biyon amnak.

4

Biynimb Gor Minim Tep Ak Angñispun Angiy, Minim Yesek Apay

¹ Gor Kawnan angak ak misen ninbun. Nin kisen ak awakniñ, Gor nup gosimb ninbun ak kirgiy, kichekiy malñiluk nop kiyk Seytan gos yesek ñimb ar ak, kisen giying angñiningambay.

² Biynimb minim yesek angñimbay kun gok, nambiñ ma gip. Minim yesek nep ang dand amiy, monmon yimb angñimbay. ³⁻⁴ Kiyk apay: bi gok biyn ma diy, biyn gok bi ma diy, tap keñmañgiy gunap asikrep giningiy apay. Pen Gor nuk asikep minim kun ak rek ma angak. Tap keñmañgiy gay, biynimb minim yipul yimb nuk ak ninjiy, nup gosimb ninbay gok, di nup tep anggying ñininingambay. Yenen: tap nuk gayak gok mañgiysek, tep anep gayak. ⁵ Nup angñinbun rek, minim nuk angip ak, tap kun gok suñ nep mindip ak mey, ñimbying mindeningambun.

Biynimb Gok Kuyip Angñirep Ginimin

⁶ Minim kun ak, mam ay gok kuyip angñirep giningamban ak mey; Gor minim tep angñey, Jiysis nup gosimb ninñak miñ tep ak direp giying, Krays Jiysis bi minim angñemb, tep bap mindeningamban. ⁷ Pen minim yikop, Gor nup angjiwpay gok, ma ang amiy apiy ginimin. Gor nup nep gosimb ninmindenimin. ⁸ Biynimb eksays yikop gipay gok, kilis gunap dipay ak pen; biynimb Gor nup chingun angiy tapin gey amimb gok, miñiy mindrep giy, kisen mindrep giy giningambay. ⁹ Minim ninjind kun ak, ninrep

yimb ginjun. ¹⁰ Gor gek, mindrep giningambun gos ak niñiy mey, kilisrimey yimb giy nep gon amimb. Nuk bi gin yimb, biynimb miñmon keykey mindpay rek, diyn angiy niñakniñ, biynimb nup gosimb niñbay gok, mañgiysek di nuk yip jimñiy ayip.

¹¹ Minim aspiyn biy, biynimb Gor ker mindpay gok angñenimin niñningiy. ¹² Biynimb gunap, nip bi paranj angiy, minim nip kirginingiy rek ayip ak, niñrep ginimin. Pen mindrep giy nep gey amek, biynimb Gor nup chingipay gok; nup gosimb niñban rek, minim tep apan rek, biynimb wasemb aypan rek, mindrep gipan rek niñiy; kuyip tep gek kunep giningiy.

¹³ Niningayn ak pen, yip kond mindpan ñin biy, Gor biynimb nuk gok kuyip, Baybol buk minim ak riyt giying, junj ak angñirep giying mindenimin.

¹⁴ Gor nup wong gining genak ñin ak, biyomb gok Gor nup angniñning, ñin jun ar nip ak ay, Gor nip kond mindakniñ, biynimb gok kuyip angñirep giningamban angyak. Bi Gor minim angap gok kunep, kun ak rek angyak. Kun ak, Gor nip gos tep ñimb rek, sakiy ma ginimin; minim nup ak monmon angñinimin. ¹⁵ Wong nup kun ak, girep genimin, biynimb gok niñey tep gek, minim nip ak diningambay. ¹⁶ Gor angip rek giying, minim niñind nup ak, angñirep giying gey amek mey, nak sek, biynimb angñimban gok sek Gor yip, mindrep giningambim.

5

Biynimb Gok Kuyip Gos Winjikniñg, Niñchikiy

Ma Angnimin

¹ Bi nop day gok kuyip, ma ang ginimin; nap nak key ak rek, angñirep ginimin. Bi paranj gok kuyip, ma ang ginimin; namam nak key ak rek, angñirep ginimin. ² Biyn gok, nanim sikop kuyip, angñirep gipan rek angñinimin. Biyn piñ gok, nanay nak key gok yip, mindrep giy angñimban rek, angñinimin.

Biyn Yandiw Gok Kuyip Minim Angak

³ Biyn yandiw ñapan ma mindip gok kuyip, kond mindrep ginimin. ⁴ Pen ñapan kiyk gunap mindeningiy, kuyip angenimin, Gor nup gosimb niñbay rek, nonim akan, nupis sikop, kuyip yimangiyak rek, pen kond mindrep giningiy. Kun geningambay mey, Gor nup tep giningamb.

⁵ Biyn yandiw key asiy yimb mindpay gok, Gor chinup kond mindeningamb angiy, pumbnamb kisyimken nup angningiyng nep mindpay. ⁶ Pen biyn yandiw miñmiñ girapay gok, kim mindpun angiy niñbay ak pen, kumiy kurginingiy rek mindip. ⁷ Minim kun biy, biynimb gok kuyip angey, biyn yandiw kiyk gok, kond mindey mey, biynimb gunap, kuyip niñchikiy ma angningambay.

⁸ Pen biynimb an, biynimb kiyk key yimb gok, direp ma giy, pen biynimb kiyk kiñiñ nokom gok, mangiysek direp ma gipay ak, Gor nup gosimb ak sakiy giy, mindrep ma giy mey, kun gipay. Biynimb Gor nup gosimb ma niñbay gok, timey yimb gipay kun ak rek, ma gipay.

⁹ Pen biyn yandiw gunap angningiy, “Yimb chinup ak, biyn yandiw Gor nup wonj gipay gok

yip tikem, Gor wong ginukniŋ, chinup tap ñiŋemb tap gok, ñinimimb angeniŋgiy,” niŋrep giy dinimimb. Biyn kun gok diniŋ, biyn tokiy bi nokom dey, kumyak gok nep dinimimb. ¹⁰ Pen biyn miñ tep ar ak nep giy, ñapan wasemb ay, biynimb okok nimb gok direp giy, biynimb Gor ker mindpay gok kuyip direp giy, biynimb kosyam mindiy, gospar ay mindpay gok kuyip, direp giy gipay gok nep dinimimb. ¹¹ Biyn tokiy ma aypay gunap, Gor wong ak giniŋgambun anŋniŋgambay ak pen; mind dand amiy, bi kisen dun anŋiy, Krays nup wong ak yiruk niŋiy, bi kisenimb diniŋgambay. ¹² Minim kiyk key nind anŋayak gok, timbrikniŋgambay ak, tep ma giniŋgamb. ¹³ Pen biyn yandiw tokiy ma aypay gok, wong kun ak giniŋ, yikop korip korip giranŋiy, biynimb gunap anŋjiwyiŋ, minim yesek kun gipay kun gipay anŋyiŋ, gi mindeniŋgambay. ¹⁴ Kun ak yand apiyn, “Biyn yandiw tokiy ma aypay gok wong kun ak ma anŋaynimimb apiyn.” Kiyk pen, bi kisenimb diy, ñapan tikiy, korip kiyk key wong giy, mindrep giniŋgambay. Mindrep giniŋgambay kun ak, biynimb Gor nup miluk niŋbay gok, kuyip anŋjiwniŋgiy rek ma ayniŋgamb. ¹⁵ Pen biyn yandiw gunap, Gor nup kirgiy, Seytan nup kisen gipay.

¹⁶ Minim bap, biyn Gor ker mindpay gok, biyn yandiw kiyk key mindonimuŋ, kiyk key kond mindeniŋgiy. Kun gey mey, biynimb Gor ker gok jimñiy, biyn yandiw key asiy yimb mindpay gok, kond mindeniŋgambay. Yikop ak, biyn yandiw kuŋay mindey, kosyam yimb kond min-

deningambay.

Biyomb Gor Nup Wong Gipay Gok

¹⁷ Biynimb gok kuyip angenimin, bi Gor nup wong gipay gok kuyip, ma kirginingiy. Gor minim angñirep gipay akan, Gor wong yerip gunap girep gipay gok, pey kuyip ak ñirep giningiy.

¹⁸ Baybol buk tikiy angyak:

“Nimb kanj makaw ponind apiy, lays chinup gok tawsimb jakey, mangiy gok key ay, cheng gok key ay gan angy; ar kun ak gining, kanj lays chinup gok ñiningambay angy, meng mingan kuyip ak, ma tiwningrimbiknimimb; wong gipay rek, gunap ñining ñiningiy angyak.”

Pen minim bap angyak:

“Bi wong gipay gok, pey ñemb angyak.”

¹⁹ Bi nokom bap nep, apiy angningamb, “Bi Gor nup wong gip ak, kun kun giy timey gip angonimun” ma ninimin. Biynimb ominjal akan, ominjal nokom rek ninjy ap angeningiy, ninind apay rek ayip angy, ninnimimb. ²⁰ Pen bi Gor wong gipay gunap, tap siy diy tap timey geningiy, biynimb lotiw opay rek, mangiysek ninmindyakniñ, kuyip ang ginimin. Kun geningamban, gunap ninjy ñawil diy, kunep ma giningambay.

²¹ Pen bi yand gok, timey ma gipay; bi kiyk gok nep gipay angy, ma angninin. Minim mindonimun, kiñiñ ak ninrep giy nep angñinin. Nip minim kun biy, yikop ma aspiyn; Jiysis ak, Gor ak, enjol suñ-tep nuk gok sek ninmindyakniñ aspiyn.

²² Pen bi Gor wong gep kisenimb gok dining, niñrep giy nep dinimin.

Biynimb gunap timey geningiy, nand yip ma giy, suñ-tep nep mindenimin.

²³ Pen nip tap minek minek giy, kongiy siwip ak, ñiñg nep ma ñiñnimin, ñiñg wayn siskoy gunap sek ñiñnimin.

²⁴ Bi gunap mindrep ma gipay ak, kasek niñbun; pen gunap mindrep ma gipay ak, ma niñbun. Kiyk gipay ak, ang amiy apiy giyakniñ, niñniñgambun. ²⁵ Bi mindrep giy, biynimb kond mindrep giy gipay gok kunep, gunap nep niñbun. Pen mindrep gipay rek minim ak, weygiy min-donimun rek ma ayip.

6

Bi Wong Yikop Giñemb Gok

¹ Biynimb Gor ker kalambis wong rek gipay gok kuyip angenimin, biyomb kuyip taw dand wiyak gok direp giningiy. Pen mindrep ma geningambay, biynimb gunap niñiy, Gor nup angjiwi, minim tep angñimbun ak, angjiwi giningambay. ² Pen biynimb Gor nup gosimb niñbay gok, bi Gor nup gosimb niñbay gunap kuyip, kalambis wong rek giñiyiñg, mam chin key gok yenen wong giñispun angiy, ma angningiy; mam tep chin Gor nup gosimb niñbay gok kond-sipun angiy, wong kuyip ak giñirep giningiy.

Tap Kunay Dun Angiy Gos Niñbay

Minim tiksipiyn biy, biynimb gok kuyip angñirep ginimin. ³ Biynimb Biyomb chin Jiysis Krays minim angak ak sek, Gor minim

per anğñimbun ak sek kirgiy, minim key gunap anğñimbay gok, ⁴ chin nep biynimb yomb mindpun anğiy, sakiy ay gos ma mindek, kun gipay. Kun ak biynimb gunap kuyip gos timey niñiy, penpen anğ amiy apiy giy, miluk yapek, penpen anğjiwpay. ⁵ Tap siy tap timey gi dand amiy, sakiy ayek, lotiw minim ak penpen yimb apay. Pen Gor minim ak anğiy, gur-maniy tap gok di nan-giy, mindrep giniᅅgambun apay.

⁶ Pen nimb mindrep ginjun anğiy, Gor anğip rek giy mey, kapkap nuk yip mindrep giniᅅgambim. ⁷ Amiy sikop chinup tikyak ñin ak, tap gunap dand ma winuk: pen kumniᅅgambun ñin ak, tap gunap dand ma amniᅅgambun. ⁸ Kun ak chech tap ñiᅅemb chin gunap mindonimuᅅ, tap chin rek mey sikoy ak anğjun. ⁹ Pen biynimb tap kuᅅay dun anğiy gos niᅅbay gok sakiy ayek, monmon gey amek, kimin tap ñiᅅniᅅ apiy gon diy, yiwur yomb dipay rek ak kuyip giniᅅgamb. ¹⁰ Biynimb maniy tap gok gosimb niᅅbay gok, tap siy tap timey ar keykey gipay. Gunap gos kun ak niñiy, Gor nup gos ak kirgiy, mindrep ma gey, kuyip key simb timey yimb gip.

Permindep Miñ Ar Ak Ma Kirginimin

¹¹ Timotiy. Nand Gor binuk yimb ak, biynimb gunap gipay rek ma ginimin; bi suᅅ-tep nuk, nup gosimb niñiy, biynimb wasemb ay, kapkap mindpay rek bap minden anğiy, ar kun ak nep gey amnimuᅅ. ¹² Kosyam mindeniᅅgayn anğiy gos ak ma niᅅnimin; Gor nip diniᅅ gek, biynimb kuᅅay niᅅmindyakniᅅ, Gor nup chiᅅgipiyn anğnak ak, nup ma kirginimin. Anğip rek, sakiy giy

nep gey amek mey, perper mindeningamban.

¹³ Gor Biyomb gek kim mindpun ak sek, Ñinuk Jiysis Krays Ponsis Paylat nup, minim yipund giy anggak ak sek niñmindrikniñ, nip kilis giy aspiyn;

¹⁴ Gor minim tep ak, yipund giy mindip rek nep niñningiy anggiy, gey amek amek, kisen Biyomb chin Jiysis Krays andkind winimun.

¹⁵ Jiysis andkind winingamb ñin kun ak, Nop nuk key anggayak. Nuk Biyomb chin kun anep, bi tep yimb; biyomb yikop gok kuyip, mañgiysek kond mindip.

¹⁶ Pen nuk nokom kumnimun rek ma mindip; per yimb nep mindeningamb. Melik tep nuk ak, key yimb mindip; biynimb gunap nup ma yimb niñbay; kiñiñ siñak amningiy rek ma ayip. Nuk Biyomb key yimb ak, biynimb mañgiysek yimb nup ak, perper dand araniñgiy. Tep.

Biyimb Krays Ker Tap Kuñay Mindek Gok Kuyip Minim Angak

¹⁷ Biynimb gur-maniy tap kuñay mindip gok kuyip angenimin, chin nep biynimb key yimb mindpun anggiy, tap kasek kurgip kun gok gosimb ma niñningiy; Biyomb biynimb kond minden, tap ma tikdek, mindrep giningiy angip anup, gosimb niñningiy. ¹⁸ Kun ak, kuyip angenimin, tap kuñay mindip rek, biynimb direp gun anggiy, tap monmon ñiningiy. ¹⁹ Kun ak rek giy mey, miñiy mindrep giy, ñin kisen ak apek, Gor yip perper mindrep giningambay.

Wong Girep Ginimimb

²⁰ Timotiy. Gor minim tep ñin ar nip ayak ak, direp ginimin. Minim yesek kiyk niñrep

giy aspun anġiy, aṅg amiy apiy gipay gok, ma dinimin. ²¹ Biynimb gunap, minim yesek kiyk kun ak diyiṅ, Gor nup pisnep kirpay.

Gor nimbip simb niṅiy, kond mindonimuṅ.

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 11 Nov 2022 from source files dated 9 Oct 2020

1491c109-3ee2-5565-9b83-06c480168547